

Riccarda

Eco dalla Bassa — Emprema impressinn

Gie, gl'emprem mument ha la «Riccarda» trumpau mei. Ni forsa, meglier detg, trumpau mei ha siu bab, il 'Vic', nies valent sribent romontsch, Ludivic Hendry da Sedrun, ni Cavorgia, che dat scola secundara a Schaffusa. Jeu spetgavel, vesend la cuviarta attractiva da siu cudisch in roman che presenti ina sort, ni problems da nossa giuentetgna ch'ei a mi en mia clamada aschi cara. Sco detg, jeu sun staus trumpaus vesend che la «Riccarda» cunteneva 'mo' historiettas. Co pon quellas bein cuntendar la gronda part dils lecturs dad oz, che garegian plitost quantitat che qualitat? Quei mi'emprema impressiun! Mes emprems patratgs. E tuttina, jeu hai entschiet a leger. Ina ga, duas ga ... E pli ch'jeu ligevel e pli ch'igl ei vegniu clar a mi:

Riccarda — in tetel simbolic

«Riccarda» ei buc ina persuna precisa che stat el center dil raquent. Na, ella ei il simbol dalla veta humana actuala, dil puls da nies temps. Ella auda buc en tschentaners da tattas e basatta, buc en idils dalla tiara muntagnarda, en idils da bostga, biestga, cauras e nuorsas — ch'ein forsa stai memia ditg sulets objects da nossa litteratura -, na ella ei actualitat, problematica da nies temps. «Riccarda» vegn carezada da tut tgi ch'entaupta ella, perquei ch'ella ei cumpogna da veta sillia medema via tuccada dil medem destin, dalla medema sort.

Agen stil

Cheu in schatg ord l'istoria «Silla spunda dil letg»:

«Igl ei meglier da vegnir sissu da tia mumma che d'endriescher dalla via. A tes fargliuns pli gronds, hai jeu risdau sco succedi. Mo ils carstgauns ch'ein levs vulan emblidar il mal e la dolur. Ils auters, ils ferms sescauldan vid lur regurdientscha. Tgei ch'ils egls da tiu hab vessen pretendiu da mei, jeu vess fatg. Tiu bab mirava meinsvart bugen el glasin. El pendeva culs fils dalla veta vid quella nauscha bubronda. Sco ei va savens. Aunc ina retscha schliats amitgs, epi ... Tgi che dat troccas cun canagls sto far lur ghegnas. Ir traso per las ustrias cuosta. Perquei tunscheva ei buca senza che era jeu mondi sil gudogn. Ei era in biala sera d'atun entuorn sontga Frena. En in vitg vischinont fuva ei perdananza. Tiu bab ha dispet vuliu separticipar dalla fiasta. Da quei viadi eis el mai pli turnaus. Siglius surengiu e staus morts.»

Nonna batta veseivlamein cun las larmas. Mo ella bragia buc.

«E... sch'el turnass, prendesses el danovamein?» «Segir, affon, carezia ha ni fiug ni liug e cuoza semper.»

«Lu astg'jeu ver bugen miu bab sco vida von.»

«Finifatg, ti has artau ina buna stella da tiu bab.»

«Mumma, per tala confidonza sai buc engraziar avunda.»

«Quater egls clars e sereins s'entaupan e giavischian da cor ina buna notg.»

Il stil da Hendry ei siu agen, quei ei ver. Buc empristaus dil vischin. Eis el perquei menders? Dacuort ha in bien amitg manegiau ch'ei seigi aschia, ch'el seigi menders. Mo ei quei ver?

In meini ei lubius a scadin. Jeu sai buc en tgei categoria d'artists ch'igl autur ei da registrar. Ses cudaschs antecedents dalla «Riccarda» — malgrad lur valeta — metessen el denter ils buns, mo buca denter ils moderns. Legend la «Riccarda» hai jeu denton giu l'impressiun da ver in pictur-artist da nies temps avon mei, che malegia — ni forsa meglier detg — ch'indichescha mo ton en si'ovra ch'igl admirader da quella sa finir ella cun siu intelletg, cun siu spért.

Il stil da «Riccarda» ei sco ils tratgs simbolics ed indicativs d'in pictur-artist modern. Historias e lungatg ein cuorts. Mo ellas lain spazi al patertgar, s'imaginar e completar da mintga lectur. A mi para la «Riccarda» dad esser ina plonta madira d'atun cun feglia en tuttas colurs. Secund sco il vent buffa tras la plonta, separeschia in niev maletg che captivescha. Secund tgi che legia la «Riccarda», legia ella auter. Dalla historietta vegn ina historiuna, sch'el ha peda da meditar in techet il legiu. Ed el vegn tschaffaus, priu ch'el seigi buc in tschep da lenna, mobein in carstgaun cun in cor normal en siu tgierp.

Engraziament, gratulaziun e recumandaziun

Engraziament e gratulaziun auda perquei a nies scribent sgr. Ludivic Hendry per sia «Riccarda». Il meglier engraziament e la pli sincera gratulaziun savein bein porscher recumandond al pievel romontsch siu cudisch niev, la «Riccarda» ch'ins sa retrer dalla casa editura «Desertina», Mustér. Medemamein engraziein a sgr. redactur Pius Condrau che ha animau e susteniu il scribent en siu luvrar. Sco detg, «Dieus paghi!» ad omisdus, e che Vus sappies, nus spetgein cun plascher e cun ina certa malpazienzia sil proxim dalla retscha: «Il fegl digl anticrist!»
Sur Giosch Albrecht, Turitg

GR 03-11-1967